

天竹軒詩集卷之三

律詩七言

寄湖州元顏太守時有福建參政之命

萬里中原路未開誰傾銀漢洗氛埃諸公多向

江南老遠使頻從海上來九月溪寒鷗夢熟三

山秋暝鶴書回莫揮白髮新亭泪且醉烏程若

下杯

次韻荅馮仁伯

閉門風雨過重九却憶同登江上臺獨客詩成
扶病起故人書到拆封開自憐風物隨南土誰

有文章落上台黃菊燃茶渾未見興來聊復舉
吾杯

甫里先生故宅時馬縣尹葺其廟

太湖三萬六千頃一代高閑獨此翁故宅有僧
茶竈在荒池無主鴨關空松陵唱和知誰再茅
屋襟期與我同寂愛長洲馬明府艱危猶自把
高風

周平叔夜宿山宗明寺海雲樓偕羅成之

隱君文長老雨盪隱君以沙頭雙瓶為韻

各賦四詩次以韻卷後

滄洲三月駐星槎聞說青原隱者家
老詠歌能玩世百年聚散若轉沙
飢來且食書中粟老去空悲鏡裏花
明日分携各努力暮雲回首隔天涯

老去無因接勝遊題詩煩寄海雲樓
天空直與海無底雲起正當樓上頭
黑水幾程通直谷青山一垓是瀛洲
高明境界無塵到撫卷令人詠未休

天台老衲兩眉龐自起高樓枕石杠
萸茗別開留客處論文多近坐禪窓
冥鴻散去猶相逐獨

鶴飛來不作雙明發仙舟上霄漢定傳詩話滿
滄江

天水空明接杳冥老禪三昧解通靈欲將東海
爲平地盡捲西江入淨瓶宿霽微分沙鳥白晚
風猶帶毒龍腥他時月夜下來相覓笑指狼峯五
朶青

丘克莊啟雲樓

君家樓外雲如海五色輪囷掃不開每就月明
簷下宿更隨秋色座中來瓊臺夜鶴迷蹤跡玉
女春衣費剪裁看女乘將朝心所舉頭西北是

蓬萊

題玉巖上人溪山野趣圖

流水淙淙石齒齒滿庭雲氣欲模糊白鷗溪上
秋多少黃葉山中路有無十月雨深漁屋破三
江風急野航孤年來難覓幽居處空向晴窻看
畫圖

寄越上能仁寺用章俊禪師

幾年卓錫住苕溪一日尋山入會稽蒲室塔曾
藏舍利道林堂已種菩提空中雲氣開樓閣門
外湍聲襍鼓鼙草木變遷吾老矣隔江南望轉

淒迷

和周伯温叅政九日南園宴集二首

步履峻巖若跨鰲望中詩興與秋高西山拄笏
東山屐右手持盃左手螯返照入湖明塔影斷
雲將雨過林臯松間飲散歸來晚金粉霏霏濕
錦袍

范相南園五百秋重來訪古轉多愁啼鳥樹老
臺空在飲馬池荒水不流芹泮好送多士樂桂
叢誰賦小山幽諸公高會詩如錦授簡安能接
勝游

嘉興繆同知號菊坡因賦

傑哉霜下轉精神一色中黃不染塵老圃看花
迎宰相秋潭分水候仙人千年東里歸何早九
日南坡賞之一上昔神農書上藥至今醫國慰
斯民

為瞿睿夫題 張伯雨外史評黃子久畫

仙山樓觀圖

陵谷東南幾變遷瓊臺仍在白雲邊閻浮世上
今何日句曲山中第八天說法久要狂外史揮
毫曾識大痴仙人間俯仰三千歲撫卷題詩一

惘然

賀耕叟晚香亭

幽香分得東籬本每候開時九月前晚歲誰從
陶靖節高風獨數傳延年清秋泛酒賓筵盛白
髮簪花客帽偏若箇芬芳同老境魏公佳句至
今傳

二月十四日風雨孤坐秀州城西僧舍賦此
秀州城西春事微二月苦雨行人稀江湖渺然
不可渡風雨如此將安歸老來口腹胡爲累亂
後人民今見非無句不得武林信倚杖南望孤

鴻飛

送馬令尹任滿

長洲赤子窮無告正賴郎官為撫摩兵後人家
猶耒耜日長官社有弦歌越來溪上波聲小魯
望初前月色多自古長才須大用薦書元不待
常何

題嘉興水西寺奕溪樓寄新仲銘長老

新公邀作奕溪遊為說削朝有此樓雲氣遠開
天北極風光仍在水西頭虛簷古瓦綠蒼眉曲
澗輕波漾白鷗宸翰僅留飛白在煙塵漠漠使

人愁

賀長洲縣尹馬公除樞密院都事

報政期年上考書君才端合應時須三公掾屬
多為相兩府郎官半是儒夜帳論兵銀燭換春
庭稱壽綵衣趨蒼生久墮顛崖苦定有嘉言贊
廟謨

次張仲舉侍讀韻

詞源浩浩倒岷江直筆如公世少雙目下十行
千字過身長九尺兩眉龐世間忠烈應知感地
下姦諛亦豎降老客中吳寧蕭索白頭猶迹讀

書窻

東饒介之

魯連不為商賈事賈監自是仙人解紛排難
乃豪傑嗜酒狂歌非隱淪燕雀一生謀水食鳳
凰千仞出風塵太湖之水東作海海上桃花樹
樹春

寄張內翰

中原不及舊山河使節仍煩涉海波天上草煙
春信早江南風雨客愁多諸公擬慰中興頌杜
士寧忘勅勒歌萬里相忘成永訣白頭蕭索奈

公何

題王仲德思誠齋

六鑿相攘揔失真一誠無妄見斯人
拍揮直擬回天地祭祀還能給鬼神
別室著龜先兆汝前楹鳥雀自相馴
明年執玉朝廷上會見尊嚴動縉紳

又

憂汝端居入靜思察機尤在未萌時
天人乎感無間物茂交攻每自持行遠
升高應得已齋心浴已固知之屈伸洞見
陰陽理榮瘁休憚風

露私

賦得落星湖送瞿睿夫任滿

南湖北湖春水多隕石下築神龍窟
渚花汀草各無賴雲影天光相蕩摩
天星勸女一盃酒海月聽我千年歌
斗牛之槎若可待送子八月乘銀河

錢塘謝太守有書見邀作此為謝

一棧遠寄楚狂生上有錢唐太守
案幾時疑是夢焚香三讀見高情
五湖風月曾賓主四海交游揔弟兄
少待西風漸涼後六橋荒蕪尚

堪行

饒介之有詩見貽次韻奉答

一夜南風約曉晴看山如在越中行丹巖別室
生虹氣嘯入空巖作虎聲倒澗枯松留古怪懸
崖飛瀑漱寒清神仙若箇能千歲吾欲崆峒問
廣成

數日南風陰復晴飯餘閑繞綠陰行竹間病鶴
褊褊影池上驚魚潑刺聲老子鬢毛如此白道
人心迹本來清能詩誰似周公子學得陰何五
字成

賀李左丞再入中書

上公開府馭羣英妙筭神機屬老成裴度向來
歸綠野謝安重起為蒼生朝廷約法三章舊天
地功成百穀盈不有武功除暴虐豈無文教於
升平

萬壑松濤為郤彥清賦

草堂夜夜聽松濤誰挽滄溟壓樹梢雷谷震驚
龍換骨風林搖蕩鶴傾巢玉山月白簫聲雜銀
漢天清劍氣交我與陶弘同洗耳乘槎便欲度
三茅

寄周平叔先生就求蒼耳子

周侯久不通書問夜夜滄江入夢頻五月采來
蒼耳子幾時分送白頭人沙頭酒熟田毛足港
上船來海錯新南北相望千百里老來幽獨倍
傷神

再題郜彥清萬壑松濤

秋入空山萬竅鳴山前山後亂潮生不知天籟
非人籟却認風聲是海聲直榦也隨羊角旋高
枝惟恐鶴巢傾畢宏韋軀還聽否慘淡經營畫
得成

蘇臺晚望

野色蒼茫落照中荒臺扶杖倚秋風延陵百里
吳封舊震澤三江禹迹空濁酒且須澆磊砢黃
金不解鑄英雄側身北望中原近幾處神州正
朔同

送謝太守平江省親廻武林就送鵝酒
之貺

五馬旣秣車載脂上堂欲別還遲遲拜家已得
阿母喜還郡即慰邦人思幾年東閣舊傾蓋今
日西湖誰賦詩野翁慙無一字補輒敢籠鵝臨

墨池

送張師廉歸富春

讀書不逢萬乘尊
獻策豈傍諸侯門
放歌蘇臺晚
山碧濯足太湖秋
水渾千仞未易買駿骨
一飯何足哀
王孫風塵拂衣且歸去
高臥桐江雲水村

寄題上海積善庵水竹軒

水閣雲廊深復深
開軒綠霧常陰陰
涼宵濯足月在港
清晝讀書風滿林
食笋也勝魚肉味
截筒誰作鳳凰吟
清涼更在聲塵外
夜夜海潮生

妙音

題何永孚瓶齋

井湄瀕閭揚雄酒
松下空藏智永書
一日挈之來市肆
百年將女置齋居
龍泉舊物魁名在
鶴髮仙翁手澤餘
我亦有瓶誰撫玩
新詩題罷轉愁予

七月久陰十日甲子復大雨

七月十日甲子雨
徹夜簷溜無休時
野老驚呼后土濕
秋田仰望皇天慈
飢鳥覓食亦散漫
病鶴顧影空禱禱
青泥沒屐不可出
蝦菜何以供

晨次

題黃岡賈彥德碧梧軒

賈誼井西梧十尋百年秀發根株深銀床分潤
長新葉翠竹交枝成好音季春花香自零亂高
秋雨氣相蕭森何當臨軒坐白石爲子載歌孤
鳳吟

寄題松江徐君瑞柳堂

稚柳一歲高於母濯濯風流健似人九烈效靈
連送客三眠扶起並留春狀如車蓋生來異色
比官袍染更新入對長楊應未晚馬前飛絮撲

香塵

送韓仲讓都司梁溪督兵防秋

今人勲業古人心立馬梁溪恨滿襟兵讖謾傳
山有錫軍裝端信橐無金風高故壘黃花晚霜
落平原白草深南省相君方倚重邊庭窮虜敢
相侵

賀毅剛中長老任承天禪寺二首

十刹親題請䟽開法筵擊鼓動春雷自離南楚
傳燈後重爲東吳倡道來兩柱承天行日月六
鰲從地湧樓臺靈山諸佛生歡喜散作祥風遍

九垓

海上東來轉法輪，祖衣傳久色逾新。
携將天目山中雨，洒向蛾眉石上塵。
行道要從無佛處，開堂須著有緣人。
等閑拈出菩提子，百草千花不當春。

九月一日寄謝太守

出入侯門五見春，每承分粟濟清貧。
託交獨喜君知我，臨老猶將子累人。
公論幾時令捧檄，私恩有日効扶輪。
魚書一扎玆藏在白髮，西湖願卜鄰。

左丞鵝酒之惠

深巷曾經顯者過，春風披拂到松蘿。
右軍墨沼籠鵝在，左相官瓶送酒多。
鄉井未忘生處樂，江湖猶賦醉時歌。
堦墀久不投名刺，柰此衰翁老病何。

題覺報寺茂竺元長老白雲窩

白雲窩裏爛如銀，不往虛空着幻身。
趺坐也教龍入定，巢居還許鶴為鄰。
自緣色界閑來往，誰與天香作主賓。
若問吾家安樂法，老夫曾學避乖人。

送松江朱煥章之烏程令尹

新除令尹烏程去霜落湖田十月初貂帽錦衣
懷印綬青簾白舫載圖書到官先謁將軍府省
俗仍陪太守車東望吳松三百里莫因萼膾賦
歸歟

題元上人怡雲軒

白雲本是山中物暫與山僧作主賓尔解自舒
還自捲我能無喜亦無嗔半間莫惜分餘地一
隴猶思贈遠人句曲有家空在望卜居何日許
為鄰

王惟賢東里草堂

平安二橋吾舊遊君屋乃在橋東頭晚山得月
更宜酒春水到門還放舟太守詩成寫素麟老
夫興發思滄洲淮南叢桂不得往撫卷目之生
遠愁

送黃觀瀾尚書吳伯尚庶使江西征討

白髮儒臣著武冠公卿相送出朝端恭承斧鉞
行天討喜見旌旗擁夏官直北聲名從此振平
南籌策有人看虎皮會見包戈甲十郡蒼生奠
枕安

江西寇盜本王民正賴諸公為解紛使者精忠
懸白日尚書高義抗浮雲喜傳天上旌旂出肯
使山中玉石焚千古魯連高世士尚將談笑却
秦軍

送羅成之移居崇明其子季通亦之本

州校官

先生八月乘煙霧妻子同隨海上槎太守賓筵
先爾客廣文官舍即為家波濤浩蕩蔽陰火島
嶼微茫接太霞聞說三洲多藥草可能無意到
丹砂

送羅季通之崇明學正

海上孤州作令官也知清選重儒冠秋潮好掣
珊瑚網曉日休歌昔蒼盞上子幾人能食祿汝
翁早歲已遺安老人亦有乘桴意就屋西沙度
歲寒

八月三日書所見

青軍黃軍日自闔西城南城門不開諸侯相對
面似土今我不樂心如灰飢鳥在樹噤無語蒼
蠅滿案從何來年衰但願飽糲食意到聊且持
吾杯

秋日登甘露寺晚眺

醉裏摩挲望眼開
江天寥落暗風埃
猶聞西府兵麾滿
不見中原驛馬來
今日賈生須痛哭
當時祖述是英才
翩然一笑下山去
試看高僧話劫灰

送孔士瞻憲史考滿歸曲阜

素王之後多賢者
清掾今為幾代孫
能以紀綱持憲法
每將節義答君恩
江淮一道風霜肅
汝穎三秋霧雨昏
不有俊良當世用
可無章疏達天閣

送張明善歸武昌却移家入蜀

對酒悲歌泪滿衣
楚天搖落又斜暉
風塵萬里與君別
江海一舟何處歸
老去且留吾舌在
愁來長惜壯心違
臨岐不盡平生意
沙苑無雲鶴自飛

南安周知事瑞雀

歲歲雙栖傍主人
昔年誰與號嘉賓
應圖夜半銜環報
不比階前得食馴
公幹題詩猶未遠
不疑作頌祇如新
東風更得周郎便
看尔翩翩上苑春

送廣東帥郎鄭彥昭貢香藥入京

萬里番禺入貢來過淮一日到蓬萊海中藥草
無人識天上桃花有處栽聖代賓興方重士星
郎年少况多才也知白壁虞鄉禮猶在黃金郭
隗臺

謝馮仁伯先生送米與舒鴈

短髮晨梳雪幾莖老來那復愛虛名只憑藥餌
扶衰朽更藉詩篇寫性情天地此心惟報主江
淮多事尚聞兵香粳分得誰相送舒鴈籠來未
忍烹

送馬上瞻帥掾高擢

風塵如此送君行念尔才華獨老成軍旅未聞
忘俎豆掾曹多見到公鄉滄江日射旌旗影紫
閣風悲鼓角聲玉塵談玄何事業雲臺圖像是
功名

寄靜逸處士顧仲庸

環堵蕭然一室寬只除詩酒寄清歡瓶中有粟
分寒士袖裏無書上執官揚子暮年空識字龐
公早歲已遺安先生獨臥風塵表吾欲相從接
羽翰

寄題金陵周子端惻隱齋

此心隨感與天同念尔斯人水火中極溺未能
空下涕救焚何以自成功百年底事多殘忍四
海于今喜擴充將見運之於掌上世間無物不
春風

吾欲卜居海上未有定止先作詩寄紫

步劉子彬

滿目風塵祇自憐輕裝已辦有行纏也知避亂
依城郭更欲移家傍渚田紫步于今無士馬滄
溟何處有神仙桃源只在人間世還許漁郎放

釣船

送適思誠之盱眙教諭

年年送人作校官也知當代重儒冠
賢才盛自覺戎藩禮數寬一絲士風今日見百
年師道後來看淮山堂上清於水莫遣驚塵到
杏壇

和張仲舉博士見寄至日詩

衡門風雪人稀到一箇幽軒竹四圍
將舊酒諸孫迎歲索新衣驚鴻此日猶南去老
鶴何年共北飛却憶太常張博士天香携袖早

朝歸

題漁樂手卷

江湖如此兩閑人除是玄真與季真長笛自吹
皆古調短篷相並即比鄰科頭不異今漁者托
通空聞古逸民亦有淶陽湖上客買舟來約理
絲綸

十一月十四日有感寄江州李子威太守
清朝如此盛公卿何以據忠荅聖明數月未收
斬水賊一時誰散武昌兵朱門舊邸空文藻黑
夜歸舟有笑聲獨使狀元賢太守至今猶捍九

江城

邊報傳來實失驚妖氛獨不犯湓城義兵一日
同生死信史千年托姓名別戍幾人迴士馬滄
江通夜走公卿九州盡得如公者始信文儒有
老成

賦吳陵鳳凰池送陳子威

蓬萊閣前春水生丹丘之鳳雙飛鳴滄波照見
雲錦色碧落散作簫韶聲豈無仙人下刷羽亦
有隱者來濯纓池上于今望吾子一曲陽春歌
太平

和張仲舉博士五月薦櫻桃之作

四月上林蒲筍出玉堂風致一時新也知天上
櫻桃宴不致山中草莽臣皂帽醉歸當此日金
盤分賜共何人吾家一樹紅堪摘取薦春醪莫
笑貧

送傅德潤陪將作同知武昌買馬回京

維揚館裏送輶車却筭分攜八載餘天使出求
沙苑馬星郎厭食武昌魚數鞭已報充華殿上
冢母忘過舊廬老我平生無駿骨可從郭隗借
吹噓

送霍仲舉經歷還京

驛程萬里入皇都還過梁城取別途天下軍需
何日了淮南民瘼幾時蘇求田問舍非良策憂
國忘家是壯圖黃閣相君應有問願聞一語贊
嘉謨

送盛克明辟掾浙省移家吳興

十年三送滄江別此日分携又不同辟掾遠趨
青瑣闥移家喜近水晶宮勿論後會知何地且
念離群獨老翁幕府郎官應問訊爲言憔悴坐
詩窮

和周子通助教同張元禎倡和詩卷
懶性何堪接貴游長松之下每科頭不能取友
山中社更欲移家海上州老去生涯清似水興
來詩思澹於秋玉堂傑作難為和白首狂吟幾
自愁

奉寄李子潔憲副時湖北殘破却于大
平開司

武昌遺老望旌旂正是諸君報國時令弟九江
全死節明公南海有生祠臺中妙選丘山重湖
北先聲草木知一道憲綱還舊觀真儒端可佩

安危

題崔原亨竹深處予家有竹數竿人號
之居竹軒原亨城西時則有竹亦數竿
人號之竹深處子與崔君通家來往何
好相同故及之

居竹軒中也自寬不愁無地着琅玕文公曾次
空千畝李洞門前只一竿天與老夫醫惡俗日
馮童子報平安崔家別墅尤高致遲子歸來守
歲寒

經山法城禪師高弟善上人以楚章為

彌因題卷後

從向經山禮法城善端開後愈分明十年楚國
非無寶一箇吳僧得此名江月自隨行道影風
林猶聽讀書聲舊家白雪親曾和處處叢林得
散行

題丹陽鄒隱君自得齋

天宇清明淑氣微昔年曾約試春衣傍花隨柳
無人識弄月吟風只自歸達士一生空好飲老
夫六十始知非陶然不得從君樂注日滄江白
鳥飛

送揚學訓導曹元秉

涿水

先生武惠之子孫粹然言貌如春溫清門為庶
忽老大白首窮經猶討論諸生分題候堂試二
膳擊鼓供膳殮今晨拂衣不肯住興在江南山
水村

題蘇文中宣使寶善齋

星郎自是魯璠璵寶善稱之信不誣豈與黃金
同日語合登清廟應時須邇池謗訛連城辟滄
海空傳照乘珠何似人
中無價者君家先世有
三蘇

次陳養吾見寄韻

我本滄江樵牧人却憐垂老見風塵邊城笳鼓
傷心近野寨旌旗入望新四海正歌垂拱日百
年猶憶至元春艱難未改心如鐵渣倒空悲髮
似銀

送婁所性訓導歸溧水

大學小學列六齋先生講席多英才公堂昕鼓
會食罷門榜月錄分題來清時如此教養備老
夫一見心神開束書胡為賦歸去石田未必荒
蒼苔

送尹敬思令尹歸青州并序

敬思令尹早歲從遊中山王京甫之門晚
歲致政歸田閉門著書重來廣陵條四十八
年出其所著大學集註有功於後學多矣
乃兄孝思憲僉亦被召可謂難兄難弟詩
中故及之

玉雪丰神未七旬江淮誰識舊儒臣眼空四海
歸何早曾著千年汲愈新從學王門惟此老發
揮朱子更何人青州門外京華近吾欲相從一
問津

憲僉被旨方脩律令尹歸田獨著書一代儀刑
留製作十章條目補遺餘青州高起耆英社白
髮同乘下澤車不得清風接芳躅可憑短札問
何如

七月十日浙省有警言有懷羅善先掾史
後聞使閩未迴

淮楚風塵可柰何南州又復動干戈三山城郭
故人遠八月江湖夜雨多白髮滿頭同老境滄
洲何處可行窩裁書欲問平安否海闊天高鴈
未過

蔣文輔以其祀親之室扁曰思齋時余
方哭母故及之

老去思親十二時燈前猶誦蓼莪詩烝嘗彷彿
歸來也顏色分明夢見之問寢不忘晨起早倚
門誰念暮歸遲多君苦行多於我忍聽長原楚
些詞

送婁所性迴金陵別業

楚甸驚塵滿客衣古之賢達在知幾山中桂樹
我將老江上草堂君獨歸刁斗連城嚴肅肅旌
旗垂野淨輝輝金陵酒熟還相憶莫遣詩筒信

使稀

簡西江宋子與令尹楊翼之李斯立二先生

八月涼風催早寒家山空憶路漫漫滄江無處問書信白日何人生羽翰曉霧漲天迷故國夜潮流月到長干諸君莫責王夷甫我輩深慙管幼安

題海陵張孝子傳

孝子張起其父幼失怙恃淮土兵革悲其母失散三十年行求四方得之

濟陰

汝翁早歲值風塵與母分離三十春遠道求之疑隔世高堂喜極轉傷神干戈滿地方多事骨肉全家有幾人甚欲題詩歌孝子老懷興感恐沾巾

哭江州太守李子威

將帥倉惶忽棄城孤忠何以獨支撐尚聞傳檄誅狂寇猶自開倉舉義兵千古報君心未死九江圖像面如生至今月黑匡廬下彷彿悲風有戰聲

哭湖廣省郎中劉遵道

百年正氣此銷沉空使諸公淚滿襟
厚地無人收白骨皇天有眼識丹心
親王兵衛終難倚太尉樓船不可尋
一自岳陽開省後更無消息到于今

哭御史張彥威

平生恨不識張桓烈烈轟轟御史官
生有高風驚海內死無遺憾負臺端
盤根錯節于今見孝子忠臣後代看
一片汝陽城下土何人高義葬衣冠

十月一日聞徐州復

黃河不解洗彭城空使群兇起鬪爭
一載始通南國貢三山猶駐朔方兵
寄奴故里人何在亞父荒陵土欲平
却憶朱陳好村落幾時烟雨看春耕

王彥芳得月樓

棟宇依稀接廣寒通宵月色好相看
人間塵土無來處天上神仙正倚闌
子晉吹簫秋引鳳嫦娥飛佩夜乘鸞
興來擬借清光便碧海三山振羽翰

胡雲夫槎山手卷代人作

故山西望白雲飛幾向江樓倚夕暉藜杖只隨
浮世在草堂終待主人歸長開篋笥看華翰不
遣風塵上綵衣今夕羽書連報捷燈花先喜到
親闈

送祕書太卿高志道總戎淮西

祕閣儒臣讀武經親承齋斧下青冥魚龍出海
瞻卿月牛斗回天避將星掃蕩妖氛清社稷指
揮能事速風霆玉堂豈少昌黎筆重刻平淮第
二銘

王彥芳逢春塢

雪窻深鎖不曾開却似陽春有脚來瓊樹每從
天上見杏花多近日邊栽任教南國芙蓉怨莫
遣東家蛺蝶回小圃無多閑草木也分生意發
枯荻

蓮花鮮為顧從善母夫人壽

采花曾入水雲鄉誰有神仙服食方分餉恰如
蘆菰味開包猶帶芰荷香瑤池阿母親曾造書
槩吳姬恐未嘗更折碧筒來送酒一時稱壽獻
高堂

和婁所性見寄韻

想見滄洲白鳥雙
寒潮依舊落空江
移家有日同春酒
剪燭何人共夜窻
欲寄短書心未展
每傳佳句意先降
吾家歲晚風流甚
雪後冰壑尚滿缸

王元剛竹所

手種新梢已拂雲
滿林蒼翠亂紛紛
龍蛇影動當窗見
鸞鶴聲來隔座聞
東里先生常直造
西隣隱者欲平分
滄江歲晚多霜雪
與尔知心獨此君

和顧仲庸韻兼謝送興

醉裏高歌若有神
山林無處著閑身
飢來欲問餐松者
老去猶為乞米人
織女機空星化石
麻姑酒盡海生塵
西清溪上梅花發
誰共先生醉好春

和黃觀瀾軍前見寄韻兼呈高志道祕卿

干戈久動阻淮濱
喜得邊庭捷報真
東海魚蝦初入饌
中原棗棗半為薪
祕卿船未移渦口
左轄軍先入壽春
多少手無兵刃者
可憐猶是賊中人

十二月十九日北門書所見

歲云暮矣北風涼獨立高樓望大荒霧氣似塵
黃作色日輪如血赤無光經綸尚有諸公在韜
略元非我輩長馮仗天威驅號令由來和氣致
休祥

寄四明夢堂靈禪師兼簡用堂上人

五山十刹鬱嵯峨獨愛溪堂隱薜蘿淮海故人
今有幾江湖尊宿近無多不聞毛女求詩去每
見倭僧問法過說向梗公重相憶碧雲日暮柰
愁何

寄靈禪師四十年前在天寧方丈曾有

求賦毛女者

短杖輕包歸去來水雲多處少塵埃一春海鳥
依簷宿五月溪蓮繞舍開雲外送僧歸日本月
中携客過天台衰翁不得瞻圓相猶望新詩托
鴈回

送馬易之迴四明

雨水經旬雪復作巷陌春泥斷往來東海祇留
詩卷在南胡誰送酒船回自慙白髮殷勤別可
惜瓊花次第開我憶慈溪舊遊地不知淮泗有

風埃

送季平仲教諭迴通川

縣庠官滿將歸日聖代賓興大比年
備榜已闈居第一前程誰謂隔二千
茲晨劍影黃塵外後夜書聲碧海邊
少待秋風叢桂發鹿鳴看尔赴
初筵

送曹德輔州判率淮農三百人赴畿內

墾田之行

茱萸灣上發官航農事相催入帝鄉
玉雪土標多似舅風雲意氣已為郎
諸公廟筭回天地百穀神功叶雨暘
來歲隨班見明主定頒鸞誥錫
高堂

送劉禹玄州判率農赴京畿墾田

京畿華壤盡提封開闢掄材獻九重
使者傳宣來萬里郎官分職領三農
江淮田賦方全免邦國軍需足上供
今日送君歌此曲廟堂無復慮
年凶

送清淮叟上人遊五臺

鴈門西畔是靈山山作青螺五髻鬟
春日花開殘雪裏僧房人在白雲間
善財參問何時遍文

暢嬉遊幾日還淮海清公更瀟洒早將聞見動
禪關

寄廣平太守鄭彥章

河山阻絕三千里臺閣勤勞十五年黃霸終然
為宰相赤松老矣號神仙洛陽城裏還無屋洛
水村中好問田走也侯門舊賓客白頭不得與
周旋

次顧清逸見寄來韻

滿目干戈獨損神古之忠義不謀身杜陵白髮
空憂國王衍清談已誤人城郭祇今餘瓦礫村
墟何處避風塵妖氛不到西清上千樹桃花別
有春

和龔兩帖韻就謝寄漢帖兩本

兩帖真如白璧雙山靈呵護過滄江不知明月
生春浦每怪晴虹貫夜窓老去祇留詩卷在愁
來寧受酒杯降竹軒近喜多風鼓活水栽荷滿
石缸

六月十三日聞邊警言甚急有感而作

邊風六月作秋聲世事驚心百感生臺閣故人
猶嗜酒閭閻小子亦談兵紅巾似草何時盡白

骨如山幾日平其欲移家渡江水老來幽獨家
關情

寄黃觀瀾經歷時率八衛漢軍屯盱眙
秋滿東南第一山古來賢達幾登攀兩城樓閣
西風裏八衛旌旂北斗間羽扇綸巾君未老麻
衣草座我空閑閉門擬撰平淮頌河上来看奏
凱還

送劉澹翁總管歸江陰時年九十

曾侍家君接勝遊于今復見舊風流江湖諸老
半黃壤鄉里小兒今白頭車馬在門為客好干

戈滿地使人愁芙蓉城內宜高隱業桂山中莫
久留

和孫行簡夜宿萬壽山經閣詩韻二首

蜀岡縹緲之飛樓風簾霧箔懸高秋雲間五色
孤鳳下木抄幾箇玄猿愁書生素有萬言策主
人贈以千金裘滄江坐嘯者誰子碌碌虛名何
足收

九曲池邊看秋色水光蕩漾青於苔白雲相邀
上山去明月更喜隨人來一聲兩聲松子落千
朵萬朵芙蓉開老僧悟我靜中意不遣堦墀留

俗埃

送廬山高齋赴南康監郡時兵火之餘
在吳城山開司

公昔騎麟下星渚前身恐是匡廬君孤城遺老
窮無告太守真符喜見分彭蠡帆檣明夕照吳
城旌旆拂秋雲明年春殿論功賞傳奏先將姓
字聞

送王彥芳之南臺御史

南臺二十四松廳上應微垣執法星定有成名
清廣海豈無章疏動朝廷鐵冠精彩還簪筆室
劔磨礪始發研竹下明年候駟馬也應旌節照
林垆

張仲舉博士書來言其老健能夜書小
字仍飲量不減喜而賦此錄上

一秋兩得平安報讀罷寒暄喜不勝花底振衣
清似鶴燈前書字小如蠅蛻仙道骨無人識博
士官銜自此升江上蓴鱸好時節豈無清夢到
吳興

癸巳九日

今年九日無一錢杞菊滿院秋娟娟閉門不出

何所作抱膝獨吟真可憐城東買竹欲移屋溪
上種秫空求田餘生飽喫廣陵飯更擬作詩三
十年

送徐州李判官供給後滿歸

千里旌旗接軸轡王師日久費供需祇知天下
金如土豈謂人間米似珠此日論功猶受賞何
人報主肯忘軀詎無執法如公者能上封章亦
丈夫

挽王彥達

老來正賴君醫我客裏那知我哭君人世百年
脩短定江城一日死生分錦帆涇上誰家屋龍
井莊前處士墳魂魄東西招不得杏林花落兩
紛紛

送詩僧立平山住圖山東遐寺

東遐只在海門東二月西橋送遠公明月不來
過竹下白雲相引到山中早時彷彿三生會何
日風流一关同少待春晴野花發新詩還肯寄
衰翁

東宮典寶監知事史仲文赴京之任賦
詩二首為餞

宮官此日盛才賢僚寀光華得妙年東禁總分
清切地前星偏近紫微天朱研玉斗時開瑤香
藝金爐曉奏箋朝覲從容問先世鄂公忠孝是
家傳

征車載道馬駟駟更盡沙頭雙玉瓶十月淮南
逢小雪五雲天上望前星龍文符瑤連函出鶴
禁簫韶弭節聽鄂國平南好勲業嘉言何處惜
朝廷

三月八日同饒介之馮仁伯張道原王
伯純雅集城東李氏園亭

五人雅集未知還况復夕陽猶在山金刀刻字
碧筠上玉卮行酒青松間三年不見兵馬息一
日且放吾儕閑桃花李花正無數明朝更約來
東關

介之懷古有詩見和復用前韻以荅

江水東流去不還幾人不老似青山九州目斷
蒼烟水萬古魂銷落照間石上烏啼松樹合水
邊人散柳花開更容野客重携酒爲報園翁莫
掩關

自美東園數往還年年詩債積如山身遊紫陌

紅塵外心在青天白日間說劍談玄俱是錯焚
香酌酒不如閑先生自是知幾者莫放聲名動
紫闕

送謝參軍朝京二首

萬方玉帛會蓬萊先報中吳進表來內使傳宣
催引見舍人當殿拆封開干戈載戰龍顏喜正
朔重頒鳳曆回却袖天香上歸騎定分春色到
蘇臺

霜落平原百草乾出門何處望朝端山林白髮
相逢晚風雪滄江欲別難使命豈辭行地遠聖

恩還復與天寬羣公定問君家世能為蒼生遠
祖安

次饒介之瓊花詩韻

此花超出萬花羣開檻真如隔彩雲瓊館曾蒙
天一关玉簫空負月三分溶溶瑞露通宵下細
細香風隔院聞后土祠前春似夢至今紅袖客
紛紛

賦得鐵甕城送揚克明之淮海書院山長

城郭猶存鐵甕基英雄曾此重藩維天連故國
山為壘地設長江水作池西府尚馮東府壯今

人不讓古人奇津亭我昔經行處目送風帆有所思

送姚節卿攝崇明判官

畫省歸來驛路長玉荆傳道石田荒一春對酒悲時事四月乘槎過海洋殺賊豈圖金作印轉官行見綉為裳孤城民瘼思蘇息回首綸音賜寵光

和李克約東臯雜興四首

一春開遍雨中花幾向東園管物華老去始知身是客愁來空擬醉為家江樓簾箔霏香霧野

寨旌旗絢采霞曳杖歸來還自咲夕陽原上數殘鴉

芍藥花開江雨晴幾時重作看花行松間携妓從教俗竹下留賓也自清一夜春愁無處着三分月色為誰明貧家亦有琴堪典好把平生生意氣傾

閉戶拙於公是非似與江湖踪跡稀酒中從令客罵坐爨下却念兒啼飢松江之鱸固可食沙苑有鳥宜高飛干戈滿地正如此萬水千山何處歸

李家園內好亭臺老去一春能幾回街頭酒貴
我當買陌上花開君不來長繩難繫白日住清
鏡莫掩朱顏催明朝有約速相就慎勿打碎玻
璃盃

送鄭復初赴白沙蔡宅館

翠竹白沙江上春主人應喜得西賓隣翁送子
去就學野老引孫來拜人夜几看書紅燭短曉
盻供饌白魚新邊塵不到滄州上我欲相從一
問津

送周草窻歸九江

太平宮館化為塵近得麻姑信未真但見江湖
同逆旅焉知天地有閑人匡山白髮歸何晚彭
澤黃花賞更新老去苦無超世術干戈滿地獨
吾身

送李周南之浙西道

應辟江南肅政堂君才十倍憲諸郎先公向已
乘驄馬多士今還覩鳳凰祖帳曉開山水霽官
船夜泊水花涼三吳民力誅求盡當為明時振
紀綱

送王仲沔御史除安慶府判

謫官南來莫怨嗟
府中爭喜判生花
中朝正合持衡鑑
御史何嘗負國家
未忝陽城官有庠
全勝賈誼傳長沙
終令國事還公等
會見明廷辨正邪

奉寄余廷心元帥時出鎮舒州

保障江淮數十州
中流竝立見君侯
蒼生幾墮巔厓苦
白髮回分社稷憂
蟬蠶竟年生介冑
貂蟬今日出堦墜
玉堂應有昌黎頌
刻在龍眠最上頭

挽孫有道處士

廣陵故舊漸消磨
白髮傷心柰爾何
馬援車猶在鄉里
黃公壩已隔山河
百年華屋春風歇
八月荒原夜雨多
亂後與君成永訣
幾行衰淚洒煙蘿

八月十五日聞真州官民潰竄道路蹂躪而死者不可勝言黃軍回之剽掠則天長六合莽為丘墟矣

白沙消息苦難真
軍事危如火上薪
老去未能生報國
愁來只與死為隣
豺狼夜嘯逃亡屋
豺虎秋驚戰伐塵
悵望天長一條路
王師何處渡

淮津

閏正月二十日聞泗州盱眙同日失守
野寨蒼茫落照中東征三載未成功黃金似土
供兒戲白骨如山泣鬼雄天狗星沉軍府動水
犀軍散弩臺空于今人力消磨盡誰念東南府
庫窮

挽郁謙德處士

身闕昇平近九旬至今謙德動朝紳眼前耆舊
無多傳亂後交游復幾人龍顧青山開宅地鶴
歸華表離風塵荒原未見兵塵息相送靈車泪

滿中

白首其如死別何臨風老淚若懸河耆英社在
晨星少禪智山空夜雨多薤露莫悲人換世堯
田曾見海生波殞宮空對棠梨發更擬重攜濁
酒過

寄題西江羅隱君本心齋

湖海翩然勇賦歸只從靜裏見天機一經斷送
休休了萬事消磨念念非隱几不知流水動開
門常見白雲飛若為同結齋中友老向蒼山采
蕨薇

送淮南省掾王安中北上安中曾為今
上說書秀才

說書妙選近丹墀名姓曾為帝所知主父徒嗟
相見晚長卿母謂不同時淮南曹事稱仁恕鄴
下民謠紀去思自古長才須大用諸公久待鳳
凰池

甲午除夜有懷孟景章

夜窻兒女笑燈前亂世安居又一年鄰甕且分
藍尾酒客囊從換折腰錢凍消屋角簷管雪寒
壓爐頭梢杻煙安得重陪孟東海劇談終夜不

成狀

題觀奕圖吳善淵作

仙翁對奕古松根當局機鋒未易論只許兩先
饒日月休將一着賭乾坤滿盤星斗無人測四
角關河有路存樵子歸來柯已爛空山寥落又
黃昏

王彥芳御史綉榮堂

色絲不染胭脂井銀漢綵成五色紋織女機中
翻海水諫官衣上綉春雲清嚴地位人誰到錯
綜天章手自分他日錦歸當白晝江花江草亦

欣欣

送澧州王伯顏治中公昔征蠻有功

南荒萬里握戎機共詫君侯奏凱歸出界舊傳
銅作柱過家新喜錦為衣梯航入貢鯨波遠溪
洞銷兵羽檄稀今日中原方用武豈無卿相布
天威

挽周古善尊師

看罷瓊花去不還今聞笙鶴在雲間十洲何處
留真迹萬古無人出此關林下故交同白髮江
南舊業只青山丹經已付無為子月夜猶疑響

瑯環

沙子守監縣二子善才善慶俱登第目

名其所居之山曰聯桂所以紀瑞也詩
以美之

山翁高步月中來移得靈根手自栽仙籍許令
諸子折君家先見兩枝開雙承御宴簪花出並
惹天香滿袖迴白笑淮南謾招隱連蜷偃蹇老
蒼苔

桂叢競發山之阿大株小株秋婆娑靈鷲峰頭
月色薄烏龍潭上天香多吳剛持斧不敢近鄰

洗對策將如何豈惟二季在仙籍諸孫還見授
枝柯

和崔元初秋日舒懷感時叙舊情見乎辭
淮南入幕皆名士邊上從軍摠貴游萬里又勞
丞相出九重獨使聖君憂禾生異畝虛占斗木
落空江欲變秋召伯埭前聽報捷高郵城外解
通舟

荔薜墻空雨氣深濕苔滿徑竹森森城中不得
三農信塞上爭禁十日陰野佃負薪多未得隣
翁乞米數相尋笙歌飲散者誰子命駕歸來醉

墮簪

瀟洒君家錦照堂石泉秋水煮茶香沿池篠簜
鞭尤潤當戶蒲萄葉半黃東館壞垣塵莫莫西
城殘照晚蒼蒼春時數聽尚書履幾送池邊月
色涼

僧惟善駙馬野雲亭

萬里飛來廣漠雲隨時舒卷故續絲風中不見
孤飛迹日下都成五色紋從尔所之占隱者更
堪持以獻吾君明時用汝為霖雨先向東南洗
惡氛

六月二日書所見

干戈滿地起風塵
民物凋零府藏貧
黃犢烏犍烹作食
雕梁畫棟拆為薪
江淮經理須賢俊
草澤誅求到隱淪
謾道寬心應是酒
老夫三日不沾唇

小軒有菊一本盛開
兩花大如酒盃饒
介之見而愛之連賦二詩因次其韻

菊下呼兒典緼袍
相看無酒目空蒿
兩花迭出金盃大
數葉輕攢翠羽高
就手折來香澹澹
滿頭簪得樂陶陶
麴生有意來相覓
畱此芬芳薦

蟹螯

滿筵香風吹客袍
却勝秋野醉簪蒿
東籬隱者世不泯
南陽老人年家高
大白盃中多趣味
中黃上內幾釣陶
莫令雨後荒三迳
更趁霜前斫兩螯

安慶大節堂至正十二年既陷武昌江
州諸郡俱各失守時韓功懋總管守安
慶指揮有方江淮賴為屏蔽廷心余帥
書大節于堂以旌武功

戰勝非難守勝難
逆圖未伐膽先寒
烏知天下

無諸葛始信軍中有一韓當日雷霆歸蹕令至
今烽火報平安雄文大扁同時出大節名堂後
代看

次饒介之述懷佳作

讀書不致卿相事生計或與樵漁同杜門真是
守株者傍人過呼居竹翁今晨把鏡野服好一
月無酒山瓢空綠陰滿地鳥聲罷向日獨有葵
花紅

千古萬古道理大海內海外車書同青山看世
寺過客白髮催人吾已翁干戈三載道路斷斤

斧一朝林野空西軒拭淚付長嘆悵望夕陽天
際紅

題太湖李北所收余廷心元帥書二封

兩函妙墨古所見一代高風人未知用兵不下
羊叔子食粥正如顏太師今日澄清在我輩長
江保障非公誰更煩令尹回州日補入舒人遺
愛碑

送拔實彥卿被召之翰林直學士

大二仙人紫綺裘偶隨明月到揚州日邊使者
徵方急泉下姦臣死亦羞宣室正思前席問淮

南誰賦小山幽玉堂信與人間隔肯為瓊花更
少留

夜泊長橋

十丈虹蜺跨碧空行人過此莫匆匆大魚吹浪
來船尾明月流光出海東根本舊邦唇齒近邊
廷諸將腹心同豐碑屹立書何事特紀當年謝
傳功

燈下有感

城郭空虛鳥亂鳴彩旗拂柳夕楊明山林樂土
非疇昔兵火殘民思太平海燕歸來無舊主野
花滿地有餘情一尊酹月悲歌後搔首燈前百
感生

金溪葛氏二孝烈女祠

葛女祠前薦荔蕉藤花風雨急飄蕭翠軒五夜
靈氣下銀穴千年寶氣銷太史已聞書孝烈遺
民無復困征徭絳唇朱袖歸黃土惆悵何人說
二喬

居竹軒詩集卷之三

居竹軒詩集卷之四

絕句五言

澹香亭

幽芳不自媚
白日淨依依
風露已如此
山中人未歸

畫枯木

老樹半無葉
石根餘野花
高秋上河漢
用汝作靈槎

墨蘭

能讓吳君子
傷讒楚大夫
延陵無宿草
湘水有

新蒲

晚興

多景樓紅樹秋風落白雲
捕魚頻得雉鷺鷥不
成群

畎畝

畎畝心常白江湖眼尚青
悠悠今古路一一短
長亭

畫竹

筆間珠樹長不借白雲裁
盡日看龍挂空疑有
雨來

趙承旨竹石

石間生石笋笋長又成林
林下纖纖草王孫去
國心

坐雨

行雲都是步聽雨甚於秋
瀟瀟易階水時時一
尺流

居竹軒

定居人種竹居定竹依人
新笋甜於肉長竿健
似身

題倭僧所畫菖蒲小景四首

海上青毛鶴山中綠髮仙相期采九節同尔壽
千年

劍脊秋逾勁鞭根老更繁何堪拜吾竹尚可友
溪蓀

昔在嵩高日仙人不可招獨行南澗底采得虎
鬚苗

怪石玲瓏白方盆瑪瑙紅倏冒到中國何處挹
清風

和饒介之春夜七絕
新月不落地四更猶有光無人防白兔竊夜搗

女霜

澗松如老友歲晚可同襟獨立風塵表悠悠千
古心

落日五湖上獨行逢故人家如隔世無物可
通神

我有太古竹青天騎作龍明當渡江去歸聽廣
陵鐘

滄浪波濤闊崑崙世界多吾無縮地法誰有步
天歌

酒量尚一斗鬢絲餘幾莖辛夷開欲罷何日問

歸程

昨夜馬頭電滿天
羊角風吹灯不敢寐
愁坐欲書空

題三友軒湯直學求賦三首

古松存古操
豈意受秦封
歲晚風塵表
空山作臥龍

吾亦憐吾竹
孤清人未知
向來多俗病
全得此君醫

古梅如古士
歲晚託同襟
不作玉堂夢
山林深更深

絕句七言

題宋子章竹

黃陵只在斷雲西
苦竹叢深望欲迷
帝子不歸春又晚
滿林烟雨鷓鴣啼

洞賓出山像

散髮空山只短衣
古來豪傑在知幾
無人識是純陽子
萬壑千岩獨自歸

鄧孝子行卷二首

歌罷河東孝子詩
滿堂賓客動嗟咨
何由得着爛編服
一日娛親十二時

哭盡秋天月不明
哀容憔悴欲無生
淚痕漬入
泉臺石萬古千秋父子情

微廟御畫
梳子白頭翁

梳子紅時人正愁
故宮衰草不勝秋
西風吹落
青城月啼得山禽也白頭

客中久雨

水滿行厨欲產蛙
苔封老屋亂啼鴉
南風十日
黃梅雨開盡冬青兩樹花

送劉將軍致仕歸襄陽

當年鐵馬渡襄江
敵國聞風夜納降
今日却歸

江上去峴山青滿
讀書窓

五月樓船始到家
山中無處不桑麻
今人却笑
東門老白髮春田獨種瓜

秋塘戲鵝圖

滿塘秋水看蒼鵝
草軟沙
奈尔何記得一羣
黃似酒杏花梁上落紅多

春夜

酒兵無力破愁城
春盡空山杜宇聲
敲缺唾壺
眠不得半簾花影月三更

贈劉生

玉堂官紙白於銀曾為山人寫綠筠絕似瀟湘
煙雨外萬竿濃翠拂秋旻

送僧南歸

門外青山翠作堆好懷能為故人開浮盃不渡
清淮水却過西軒看竹來
芒屨猶香楚地花一鉞隨處是生涯不須乞食
游方去舍利城多長者家

青山白雲圖

不見茅齋舊隱君遠溪煙樹暮紛紛斷橋水滿
無人渡誰向青山管白雲

墨梅

東閣衝寒雪一枝巡簷偏解索題詩何郎老去
風情減羞見踈花照鬢絲

夜宿野城

露氣涓涓欲二更小舟猶向月中行前村知有
人家近隔浦微聞犬吠聲

草虫卷子

蝸名蝶夢恣成空絡緯徒知紡績工可似螳螂
化蟬去最高枝上吸清風
鳴蜩織女共驚秋嗟尔微虫死即休矚目闔蛙

猶未已請看粘壁綴蝸牛

正月晦日

問余何事日匆匆把卷題詩轉不工
檢曆又看正月過一分春在酒盃中

畫馬

圍人爭喜得驂騮撥入天閑早見收
今有誰憐駿骨西風沙苑蒺藜秋

送人之武林

白鼻騮駟紫綺裘湧金門外醉瀛洲
君家若有平安字寄在春風第幾樓

題四明太守丁宴學官卷子

莊嚴七寶供西僧甲第紛紛競
割烹獨有四明賢太守杏壇春酒宴諸生

武林客舍

窓外青山啼子規吟魂正被酒禁持
小樓一夜雨聲惡落盡碧桃人未知

綠楊橋

長溪春漲碧溶溶煙雨空濛濕采虹
何事吹簫度清夜漸堤揚柳月明中

清泉寺

何人泉上記清游茶具橫陳晚未收木葉盡隨
風掃去萬山青立寺門秋

題高房山墨竹

黃花山主澹游翁寫竹依稀篆籀工獨有高侯
知此趣一枝含碧動秋風

題張天民先生移居圖

舊隱荆溪第幾村手栽松檜至今存大茅峰下
千年鶴遲汝重來問子孫

同鄭明德訪寶曇上人不過二絕

白雲林下誦經寮隔岸香風遠更飄欲就禪床

喫茶處倩人扶過木長橋

打門來訪寶曇僧松下雲深喚未應誰識二生
舊行路斷崖蒼蘚絡枯藤

題鄧毅夫所藏青山白雲圖

山後山前暝不分草堂無迹覓微君惟餘玉氣
無藏處散入空青作白雲

高昌王所畫蒲萄熊九臯藏

玉闕西去火州城五月蒲萄無數生今日江南
池館裏萬株聯絡水晶棚

雲山小景

我家草堂南澗濱門前不識車馬塵白雲相隨
過山去天地別有人間春

青山白雲圖

溪上長松已合圍草堂無事客來稀濕雲生滿
東山路日暮野樵何處歸

唐明皇吹簫圖二首

寢殿春深晝漏遲榻前侍女立多時玉簫自按
霓裳曲賜與梨園弟子吹
花萼樓前柳色新東風吹散馬嵬塵錦囊玉管
俱零落誰是終南夢裏人

題蒲塘双燕圖為劉小齋作

昭陽池館晚風微花落巢空去未歸却是蒲塘
春水闊年年還傍小齋飛

九月十二日出北郊

官河兩岸土城低旗幟青紅望欲迷萬木千林
誰伐盡數家茅屋野鳥啼

竹枝歌

道士莊前秋事多東家西家收晚禾船頭把酒
對明月聽打夜場人唱歌
喬麥花開如白煙併催農事了霜前晚禾未割

豆先熟双結女兒齊下田

題獐猿便面

樹上孤猿樹下獐山林物性各相忘不知萬里
中原闊鷹犬交馳首着場

訪王伯純晚歸

長洲苑內舊池臺白髮山人又再來無限客愁
渾忘却小樓聽雨杏花開

和饒介之秋懷詩韻

隣甕新篘麴米香夢魂夜夜遶槽床故人不在
今何在秋盡空山首蒼長

江風吹盡暮天霞我本淮人來寄家吳門留滯
不歸去閒盡兩軒白鶴花

夜半金烏海上翔行來夾日酷於霜庭前幾個
芭蕉葉未到秋分一半黃

鉄鎖滄江第幾關揚州花竹夢中看也知無賴
三分月照見沙塲白骨寒

月落未落明星高宿雲捲盡無秋毫中庭隱几
復假寐候虫四壁聲勞勞

洲面茨萼葉半舒湖中新出四腮魚黃金換酒
須當醉莫信黃金可貯儲

鳳凰橋西淮子河年年租吏夜催科祗今田父
無消息豹虎滿村將柰何

氛侵冥冥晚未消浙江三日不通潮令人却憶
馮公子知在西湖第幾橋

彭澤歸來落落然風流不寫義熙年東籬菊種
無尋處老樹荒苔鎖暮烟

橫江孤鶴翅如輪一別山林五百春肯信老夫
騎過海方壺負嶠少風塵

再次韻

花燭銀臺沉水香為郎先暖合歡床小姑納聘

山堂上纏酒紅綃十丈長

橫江江水蕩晴霞秋盡夫君不到家閨中小鬟
也浪語陌上聽歌楊白花

寫就安書無便翔寒衣着破過三霜但記送郎
初上馬窄袖短衫穿柳黃

西到長干過幾關附得書來儂自看八疋西川
十樣錦裁作即衣遮早寒

柳枝歌比柳枝高紅紙烏絲紫兔毫夫婿從軍
不識字殷勤寫去也徒勞

阿翁生兒如阿舒少年不殊同隊魚但見門前

有人客肯信篋中無積儲

老翁買舟西市河去應不求聞達科阿婆牽衣

翁且住下第歸來將柰何

洞庭山嵐猶未消砲車雲起怕風潮勸即把柁

莫放手水惡須防第四橋

江頭野花紅欲然春去秋來不計年尋得秦皇

繫纜石青沙一色草如烟

鴛鴦湖西湖水涼踏藕採蓮來覓即即意莫如

菱刺短妾情只似藕絲長

江南秋熟轉飢寒頭上猶簪列士冠雞犬全家

上天去學仙悔不事劉安

題南竹

洞庭南去竹如雲老葉新梢亂不分帝子不歸

風雨惡深林何處覓湘君

題宮人汲井

轆轤輕轉汲清冷玉碗盛來道內庭別院有人

愁似海眼花落井怨銀瓶

雜賦五首

民間升斗采倉陳五十青錢一束薪黑潦滿街

風雨惡日中猶有未炊人

農父驅牛曉入城可憐牛賣盡遭烹明年湖上
休兵後一寸荒田不得耕

破錢羞澁客囊傾萊把青青價稍平却喜連朝
知肉味敢云何處有魚羹

高陽社中醉復醒于今老友俱凋零街頭酒薄
不堪飲四百青錢沽一瓶

十月一日河上行軍中少年知姓名誰家一兒
駕艇子肯載老夫同入城

哭馬士明都事

冥冥妖祲黑如雲湖上旌旗亂不分父子心人

同戰死邊庭誰說馬將軍

干戈未定失英雄野寨無人戰艦空三十六陂
波浪惡故人何處哭秋風

題徐仲原所藏王冕畫紅梅

羅浮仙子絳綃裳也欲隨時學艷粧今日北人
渾見慣杏花同色不同香

居竹軒詩集卷之四

周子曰四詩而下學者獨宗漢魏宗盛唐而餘無
取焉斯亦近誣矣夫詩成乎音音成乎聲聲成
乎氣天之質也氣成乎志志成乎情情成乎性
天之秉也始乎天秉放乎天質詩之義也夫天也
者機也機也者神也機妙而感神妙而應夫人同
也是故詩也者同則昭物異則昭變義之大也真
之適也而又何差焉夫詩之風也自邶而下多變聲
也聖人脩經存而弗削與二南雅頌比載而傳焉昭
異於同徵其天也夫詩也於其容與而暢焉於其
結約而舒焉於其冲寂而恬焉於其矜惋而感焉

於其憤溢而激焉同性也而情鍾矣同情也而志
萌矣同志也而氣從矣同氣也而聲倡矣同聲也
而音協矣同音也而詩具矣是故宇宙者一身也
古今者一息也即詩之初求詩之奧其同者可以
觀矣又何泥焉故曰觀於谷而知籟也觀於螽而知
韶也天之謂矣予暇日偶讀居竹軒詩因以志之
賜進士出身廬州府知府前刑科都給事中周瑯
識